

菩薩本行經



百十九
器九

48660



元祿九年丙子二月日重脩

皇圖鞏固 帝階綴昌

佛日增輝 懋輪常轉

山城州天安寺法金剛院置

菩薩本行經卷中

失譯附東晉錄

器

昔佛在舍衛國祇樹給孤獨園時有賢者名
曰須達居家貧窮無有財產至信道德往至
佛所頭面作禮瞽首佛足却坐一面聽說經
法佛問須達在家之士當行布施不布施也
須達白佛當行布施多布施耶少布施也當
以好意而布施耶以不好意而布施乎佛告
須達夫於布施所施雖多而獲報少布施雖
少而獲報多何謂施多而獲報少雖多布施
而無至心無恭敬心不大歡喜貢高自大所
施之人信邪倒見非是正見不得快士所施

雖多而獲報少猶如耕田薄地之中下種雖多收實少何謂施少而獲大福所施雖少歡喜與淨潔心與恭敬與不望報與所施之人復得快士佛及辟支佛沙門四道應正見者所施雖少獲報弘大猶如良田所種雖少收實甚多佛告須達吾自憶念過去世時此閻浮提有轉輪王名波陀毘寧王有千子主四天下此閻浮提有八萬四千國時有一婆羅門名曰比藍身體金色端正無比聰明智慧天地變運醫方鎮壓上知天文下察地理中知人情一切典籍靡不貫達為人仁愛慈愍一切王甚愛敬八萬四千諸王及國人民

亦皆奉敬以爲師主比藍大師是爲大王非
是波陀毘寧何以故波陀毘寧王治國正民
一一諮啓比藍大師亦乃教化諸王臣民莫
不歡喜於時大王而從比藍啓受經典亦復
宣告八萬四千諸小國王群臣太子一切人
民皆從比藍諮受經典習學智慧諸王臣民
皆從比藍啓受經典莫不歡喜皆言此是梵
天來化我等爲於好事非是凡人於時八萬
四千諸王受學智慧心意開解皆大歡喜八
萬四千諸小王人持一白象金銀交絡駿馬
一疋亦金銀交絡牛一頭亦金銀交絡妙女
一人亦端正無比七寶瓔珞服飾姝好金鉢

盛銀粟銀鉢盛金粟琉璃鉢盛金粟頗梨鉢
盛金粟以金爲車七寶莊飾各各皆金有八萬
四千以用貢上比藍大師亦時大王波陀
寧聞諸小王貢遺比藍大用歡喜我亦當復
貢上比藍大師財寶即時莊嚴八萬四千王
女之等七寶珠璣服飾姝妙瓔珞其身八萬
四千白象純金交飾八萬四千疋馬亦金銀
交絡八萬四千頭牛盡金莊校八萬四千金
鉢盛銀粟八萬四千銀鉢盛金粟八萬四千
琉璃鉢盛金粟八萬四千頗梨鉢盡盛金粟
八萬四千乘車盡金交飾用上比藍比藍受
已念此財寶象馬車乘一切所有皆悉非常

而不堅固白大王言財產所有皆悉非常摩
滅之法我不用之意欲布施濟諸窮乏王聞
其言大用歡喜告勅群臣擊鼓宣令閭浮提
內貧窮孤老婆羅門梵志皆悉來集比藍即
設大檀人民聞令雲興而集強弱相扶皆悉
來至於時比藍欲澡婆羅門手傾於軍持而
水不出大用愁憂今我大祠將有何過意不
清淨所施不好以何等故而水不出即時天
人於虛空中語比藍言汝今布施大好無比
其心淨潔無能過者汝之功德天下第一無
過上者但所施人盡是邪僞倒見之徒非是
清高使士之輩而不堪任受汝澡敬以是之

故水不出耳於是比藍聞天人語意便開解
即作誓言今我所施用成無上正真之道審
如所願者令我寫水當墮我手中作誓願已
訖便傾澡瓶水即來出自墮掌中諸天空中
讚言善哉善哉如汝所願成佛不久尔時比
藍布施貧乏之衣被飲食一切所須十二年中
象馬珍寶玉女之等盡用布施無所藏積佛
告須達尔時比藍婆羅門者今我身是而我
尔時所施亦好其心亦好受者不好所施雖
多獲報甚少而今我法真妙清淨弟子真正
所施雖少獲報甚多於是比藍十二年中所
作布施及閻浮提一切人民行於布施計其

功德不如布施一須陀洹人其福甚多過出
其上設施百須陀洹并前比藍閻浮提
人所得福報不如施一斯陀含人其福甚多
亦過其上正使施百斯陀含百須陀洹及前
比藍施閻浮提人所得福報不如施一阿那
含人其福倍多過出其上施百阿那含人百
斯陀含百須陀洹并前比藍閻浮提人所得
福報不如施一阿羅漢其福甚多過出其上
正使施百阿羅漢百阿那含百斯陀含百須陀
洹并前比藍閻浮提人所施功德不如施一
辟支佛其福甚多過出其上正使布施百辟
支佛百阿羅漢百阿那含百斯陀含百須陀

洎及前比藍施閻浮提人所得功德不如起
塔僧坊精舍衣被牀卧飯食供養過去當來
今現在四方衆僧沙門道士給其所須計其
功德過前所作功德者上雖起塔僧房精舍
施辟支佛阿羅漢阿那含斯陀含洎并
前比藍閻浮提人所作布施福德不如施佛
一人功德甚多不可復計雖供養佛起塔僧
房精舍及辟支佛阿羅漢阿那含斯陀含須
陀洎并前比藍閻浮提人所施功德不如有
人一日之中受三自歸八關齋若持五戒所
得功德踰過於前所施福德百千萬倍不可
爲喻復以持戒之福并合集前一切施佛功

德及辟支佛四道之等合前比藍閻浮提人
所施福德不如坐禪慈念衆生經一食之頃
所得功德踰過於前百千萬倍踰前比藍閻
浮提人所作布施施四道辟支佛起塔僧伽
藍上至施佛持戒坐禪慈念衆生合集其德
不如聞法執在心懷思惟四諦非常苦空非
身之法泥洹寂滅比前所作一切功德最尊
第一無有過上於是須達聞法踊躍無量身心
清淨得阿那含道唯有五金錢一日持一錢
施佛一錢施法一錢施僧一錢自食一錢作
本日日如是常有一錢在終無有盡即受五
戒長跪白佛言我今日欲心已斷處在居家

當云何也佛告須達如汝今日心意清淨無
復愛欲汝還歸家問諸婦女今我欲心已滅
汝等各從所樂須夫婿者恣從所好若欲在
此當給衣食須達受教爲佛作禮便還歸家
問諸婦女我今愛欲都已永盡無復欲事汝
等若欲須夫婿者各隨所好欲在此者供給
衣食令無乏少諸婦女等各各從意隨其所
樂時有一婦人煇穀作麩有牂牁來拙煇麥
不可奈何捉擿火杖用打牂牁杖頭有火著
羊毛羊毛得火熱用揩象廐象廐火然并燒
王象象身爛破便殺獼猴用拍象身天於空
中而說偈言

瞋恚鬪諍邊

不當於中止

羯羶共相牴

蠅蟻於中死

婢共特扞鬪

獼猴而坐死

智者遠嫌疑

莫與愚人止

波斯匿王勅臣作限自今以去夜不得然火
及於燈燭其有犯者罰金千兩尔時須達修
道在家晝夜坐禪初人定時然燈坐禪夜半
休息鷄鳴復然燈坐禪伺捕得之捉燈白王
當輸伐負須達白王今我貧窮無百錢產當
用何等輸王罰負王瞋勅使閉著獄中即將
須達付獄執守四天王見須達被閉在獄初
夜四天王來下語須達言我與汝錢用輸王
罰可得來出須達荅言王自當歡喜意解不

須用錢為四天王而說經竟天王便去到中
夜天帝釋復來下就而見之須達為說法竟
帝釋便去次到後夜梵天復下見於須達便
為說法梵天復去時王夜於觀上見獄上有
火光時王明日即便遣人往語須達坐火被
閉而無慙著續復然火須達荅言我不然火
若然火者當有煙灰表式復語須達初夜有
四火中夜有一火倍大前火後夜復有一火
遂倍於前言不然火為是何等須達荅言此
非是火也初夜四天王來下見我中夜第二
天帝來下見我後夜第七梵天來下見我是
天身上光明之焰非是火也吏聞其語即往

白王王聞如是心驚毛豎王言此人福德殊特乃尔我今云何而毀辱之即勅吏言促放出去勿使稽遲便放令去須達得出往至佛所頭面作禮却坐聽法波斯匿王即便嚴駕尋至佛所人民見王皆悉避坐而起唯有須達心存法味見王不起王心微恨此是我民

懷於輕慢見我不起遂懷愠心佛知其意止不說法王白佛言願說經法佛告王言今非是時爲王說法云何非時人起瞋恚忿結不解若起貪婬耽荒女色憍貴自大無恭敬心其心垢濁聞於妙法而不能解以是之故今非是時爲王說法王聞佛語意自念言坐此

人故令我今日有二折減又起瞋恚不得聞
法爲佛作禮而去出到於外勅語左右此人
若出宜斫取頭作是語已應時四面虎狼師子
毒害之獸悉來圍遶於王王見如是即大恐
怖還至佛所佛問大王何以來還王白佛言
見其如是恐怖來還佛告王曰識此人不至
曰不識佛言此人以得阿那含道坐起惡意
向此人故是使尔耳若不還者王必當危不
得全濟王聞佛語即大恐怖即向須達懺悔
作禮羊皮四布於須達前王言此是我民而
向屈辱實爲甚難須達復言而我貧窮行於
布施亦復甚難尸羅師質爲國平正爲賊所

捉賊語之曰言不見我我當放汝不者殺汝
尸羅師質意自念言今作妄語為非法事若
墮地獄誰當放我作是思惟便語賊言寧斫
我頭終不妄語賊便放之危害垂至不犯妄
語順行正法實為甚難復有天名曰尸迦梨
復自說我受八閔齋於高樓上卧有天王女
來至我所以持禁戒而不受之實為甚難於
是四人各各自說如是即於佛前而說頌曰
貧窮布施難 豪貴忍辱難 危嶮持戒難
少壯捨欲難

佛說偈已重說經法王及臣民皆大歡喜為
佛作禮而去

聞如是一時佛在羅閱祇比留畔迦蘭陀尼
波僧伽藍憂連聚落有一泉水中有毒龍名
曰酸陀梨甚大凶猛放於雹霜傷破五穀令
不成熟人民飢餓時有婆羅門呪龍伏之令
不雹霜五穀熟成經有年載此婆羅門遂便
老耄呪術不行尔時有壯婆羅門呪術流利
舉聲誦呪雲便解散令不雹霜五穀豐熟人
民歡喜語婆羅門在此任止當共供給令不
乏少婆羅門言可便任於彼常共合斂輸婆
羅門不使有乏自佛來入國廣說經法人民
大小咸受道化得道甚多諸龍鬼神皆悉為
善不作惡害風雨時節五穀豐賤更不供給

婆羅門所須婆羅門往從索之諸人民輩逆
更唾罵而不與之時婆羅門心起瞋恚蒙我
恩力而得飽滿反更調我欲得破滅人民國
土便問人言求心所願云何得之人語之言
飯佛四尊弟子必得從願如心所欲時婆羅
門即設飯食請大迦葉舍利弗目連阿那律
飯是四尊至心作禮求心所願我今持此所
作福德願使我作大力毒龍破滅此國必當
使我得此所願時舍利弗道眼觀之求何等
願知婆羅門心中所念願作毒龍欲滅此國
時舍利弗語婆羅門莫作此願用作龍蛇害
惡身為若欲作轉輪聖王若天帝釋魔王梵

王盡皆可得用此惡身不好願爲時婆羅門
答舍利弗言久求此願適欲得此不用餘願
時婆羅門舉手五指水即流出時舍利弗見
其意堅固證現如此嘿然而止時婆羅門及
婦二兒俱願作龍死受龍身有大神力至爲
毒惡便殺酸陀梨龍奪其處任便放風雨大
墮雹霜傷殺五穀唯有草結因名其龍阿波
羅利婦名比壽尼龍有二子一名璣部尼人
民飢餓死者甚多加復疫病死者無數時阿闍
世王往至佛所頭面作禮長跪白佛國界人
民爲惡龍疫鬼所見傷害死者無數唯願世
尊大慈大悲憐愍一切唯見救護攘却災害

佛即可之。尔時世尊明日晨朝著衣持鉢入城乞食。詣於龍泉，食訖洗鉢，洗鉢之水注於泉中。龍大瞋恚，即便出水吐於毒氣，吐火向佛。佛身出水滅之。復雨大雹在於虛空，化成天華。復雨大石化成琦飾。復雨刀劍化成七寶。化現羅刹佛。復化現毗沙門王、羅刹，便滅龍。復化作大象鼻提利劍佛，即化作大師子王象，便滅去。適作龍像佛，復化作金翅鳥王。龍便突走，盡其神力，不能害佛。突入泉中，密迹力士舉金剛杵打山，山壞半墮。泉中欲走來，出佛化泉水盡成大火。急欲突走，於是世尊踏龍頂上，龍不得去。龍乃降伏，長跪白佛。

言世尊今日特見苦酷佛告龍曰何以懷惡
苦惱衆生龍便頭面作禮稽首佛足長跪白
佛言願見放捨世尊所勅我當奉受佛告龍
曰當受五戒爲優婆塞龍及妻子盡受五戒
爲優婆塞慈心行善不更霜雹風雨時節五
穀豐熟諸疫鬼輦盡皆走去向毗舍離摩竭
國中人民飽滿衆病除愈遂便安樂毗舍離
人民疫病死者甚多聞摩竭國佛在其中降
伏惡龍疫病消滅毗舍離王即遣使者往至
佛所於是使者前至佛所稽首佛足長跪白
佛言王故遣我來稽首問訊如來大聖我國
疫死者甚多唯願世尊大慈憐愍臨覆我國

勞屈光威望得全濟毗舍離國與摩竭國素有怨嫌阿闍世王聞毗舍離國疫鬼流行大用歡喜尔時世尊告毗舍離使我以先受阿闍世王九十日請而今未竟汝自往語阿闍世王使白佛言二國素有怨嫌我今往到必當見殺佛告使言汝但為佛作使終無有能殺汝者也佛重告使言語阿闍世王殺父惡逆之罪用向如來改悔故在地獄中當受世間五百日罪便當得脫使即受教往詣王門王及群臣聞毗舍離使在於門外咸共瞋恚皆共議言當截其頭瓦其耳鼻碎其身骨當使如麴使入到殿前大唱聲言世尊遣我到夫

王邊聞是佛使皆各歡喜王問使言佛遣汝
來何所告勅使便答言佛謝大王所作惡逆
殺父之罪用向如來懺悔之故在於地獄當
受世間五百日罪便當得出唯當自責改往
修來莫用愁憂王聞是語歡喜踊躍不能自
勝我造逆罪在於地獄爲有出期即遙向佛
誓首作禮王語使言汝能爲我致此消息快
不可言欲求何願恣當與汝使白王言毗舍
離國疫病流行欲得請佛光臨國界望得全
濟唯願大王聽佛使去王即可之便報使言
語汝大王我從城門到恒水邊修治道路以
華布地羅列幢幡到恒水邊舉國兵衆侍送

世尊到恒水邊汝亦當從毗舍離城平治道路而散華香羅列幢幡到恒水邊舉毗舍離臣民兵衆盡來迎佛到恒水邊若能尔者聽佛使去不能尔者不放使去毗舍離使聞王所使歡喜踊躍即便辭還到於佛所頭面作禮白佛如是佛即可之使便辭佛作禮而去

還毗舍離白王如是王聞所言大用歡喜我曹國中亦須種福即便宣令平治道路從於城門到恒水邊悉令清淨布散諸花燒衆名香豎諸幢幡毗舍離王舉國臣民槌鍾鳴鼓作衆伎樂到恒水邊迎佛世尊持五百蓋上貢世尊摩竭國王亦復宣令修治道路悉令

清淨布散華香豎諸幢幡到恒水邊與諸臣
民舉國兵衆推鍾鳴鼓作衆伎樂震動天地
待送世尊到恒水邊以五百蓋奉上世尊四
天王忉利天王上至化應聲天王各各皆與
無數諸天各賫天上異妙珍琦雜種華香若
干伎樂持五百寶蓋來貢上世尊第七梵天
王上至首陀會天是諸天王各與無數諸天
子等各賫天上雜妙香花若干伎樂時五百
寶蓋貢上世尊毗摩毗羅阿湏輪王與無央
數阿湏輪民持於衆寶雜種花香若干伎樂
五百寶蓋來奉上佛娑竭龍王與無數諸龍
眷屬各賫若干種香作衆伎樂五百寶蓋來

奉上世尊合三千蓋唯留一蓋餘悉受之所
留一蓋者持用覆護後諸弟子令得供養當
于尔時諸天人民龍阿須倫不可稱計來至
佛所毗舍離王及諸臣民皆言今佛當度恒
水我曹當共作五百船使佛度水摩竭國王
及諸臣民亦言今日佛當度水我曹亦當作
五百船令佛度水諸天亦各作五百寶船諸
阿須倫亦復共作五百寶船于時諸龍自共
編身作五百橋欲令世尊蹈上而度尔時世
尊見於諸天一切人民龍阿須倫各各歡喜
有恭敬心欲使衆生普得其福即便化身遍
諸船上諸天人民龍阿須倫皆各自見如來

世尊獨在我船不在餘船於是如來度水已
竟無數諸天側塞虛空散衆名花燒異妙香作
諸伎樂人及諸龍并阿須倫皆亦是散衆
名花燒衆雜香作諸伎樂娛樂世尊歡喜無
量于時如來觀於三界諸天人民心懷歡喜
踊躍無量供養如來世尊將欲說於前世本
所修行菩薩道時即便微笑五色光明從口
中出光有五分之一光明出無數明一一光
頭有寶蓮華一一華上皆有化佛一分光明
上照欲界色界無色界三界諸天見其光明
又覩化佛皆悉歡喜各離欲樂來詣化佛所
聽說經法無量諸天聞說經法歡喜踊躍皆

各得道迹往來不還無著證者發大道意入
不退轉者一分光明遍照三千大千世界在
六道者光明化佛彌滿世界一切人民見其
光明又覩化佛瞋恚盛者忿意消滅皆發慈
心婬火盛者欲心消除觀其瑕穢愚癡盲冥
皆悉醒寤解四非常牢獄繫閉悉皆放解盲
看得視聾者得聽瘖者能語拘癱者得手足
瘡殘百病皆悉除愈一切人民莫不歡喜各
離所樂來詣佛所時諸化佛各各說法心意
開解或得道迹往來不還無著之果發於無
上正真道意堅住大乘不退轉者不可稱計
一分光明照於一切餓鬼境界光明化佛悉

遍餓鬼境界之處諸餓鬼等見佛光明自然
飽滿無有飢渴身心清淨無諸惱熱聞其說
法皆悉歡喜慳垢消滅壽終之後皆得生天
一分光明照於大千畜生境界一切禽獸見
佛光明皆悉歡喜善心自生虎狼師子龍蛇
毒惡之心皆悉消滅慈心相向不相傷害壽
終之後皆生天上一分光明遍照大千地獄
鐵圍山間幽冥之處莫不明徹一切地獄衆
生之類見其光明又覩化佛歡喜踊躍火滅
湯冷考治酷毒皆得休息冰寒獄中自然溫
煖地獄衆生既得休息歡喜踊躍諸化佛等
各爲說法心開意解即時壽終盡得生天當

于是時光明化佛彌滿三千大千世界五道
衆生皆得度脫凡於如來光明入處各有所
應欲說地獄事光從足下入欲說畜生事光
從足上入欲說餓鬼事光從脛踝入欲說人
道事光從脰入欲說轉輪聖王事光從齋入
欲說羅漢事光從口入欲說辟支佛事光從眉
間入欲說菩薩事光從頂入欲說過去事光
從後入欲說當來今現在事光從前入亦時
世尊現大變化光明普照十方世界大千境
界雨衆天花無量伎樂不鼓自鳴諸天人
民一切大衆莫不歡喜倍加踊躍於是世尊還
攝神足光明便還遶佛三匝光從後入無量

諸天一切大衆異口同音讚嘆如來功德巍巍難量不可思議乃如是乎於是阿難長跪叉手前白佛言佛不妄笑笑必有因今日世尊欣笑如是將欲自說先世宿行佛告阿難及諸大衆乃昔過去久遠無量無數世時此閻浮提有轉輪王名修陀梨鄯寧王四天下此閻浮提八萬四千諸小國王八萬四千城王有七寶一金輪寶輪有千輻縱廣四十里周帀百二十里王欲行時輪在前導不賓伏者金輪自然在頭上旋自然降伏不用兵仗有二摩尼珠寶著於幢頭晝夜常照千六百里三白象寶其象身體優修姝好白如雪光

王乘其上自然飛行一食之頃周四天下四
紺馬寶朱色鬣尾王乘其上二食之頃遍四天
下五典兵臣王意欲得百千萬兵自然而至
六典藏臣王意欲湏金銀七寶衣被飲食披
其兩手七寶財產一切所湏隨意所欲從手
中出而無有盡七玉女寶端正無比猶若天
女無有女人瑕穢之垢身體香潔如優鉢花
王意欲得清涼之時身自然冷欲得溫時身
自然溫聲如梵聲常能使王歡喜踊躍名曰
玉女寶王有千子勇猛無比王欲出時七寶
大蓋常在其頭上七寶隨從群臣無數導從
前後百千伎樂其音和雅巍巍堂堂不可稱

計王千子中其最小者見王如是問其母言
此何國王巍巍如是其母荅言此是修陀鄩
寧大轉輪王主四天下汝之父也不識之耶
太子報言我當何時應得爲王母復荅言王
有千子汝第一小不應得王太子復言若不
應得爲王者何用在家作白衣爲即便長跪
白其母言願聽出家作沙門詣山澤中學於
仙道母即聽之其母告言若汝思惟所得智
慧必還語我兒即許之即便剃頭而著袈裟
詣於山澤精進坐禪思惟智慧內解五陰外
了萬物皆悉非常一切受身衆苦之器飛輪
王帝豪駿世主三界尊榮猶若幻化空無吾

我緣會則有緣離則無皆從癡愛因有諸行
以有諸行受一切身五道之分便有衆苦若
無癡愛則無諸行以無諸行則無五道以無
五道則不受身以無有身衆苦便滅思惟如
是霍然意解成辟支佛飛騰變化六通清徹
無所罣礙如其本誓便還見母現其神足身
昇虛空經行坐卧身上出水身下出火身止
出火身下出水分一身作百作千作万無數
還合爲一其母見之歡喜踊躍頭面作禮母
復問言從何所而得飲食荅言乞旬自存母
復白言莫更乞食當受我請從今以往在此
園中住願當日日受我飲食亦當使我得其

福德時辟支佛便受母請住於園中其母日
日自往飯之於彼園中經涉數年思惟身分
瑕穢不淨身爲苦器何用此爲便捨身命入
於泥洹而般泥洹其母即便耶旬起塔華香
供養王於異時到此園中見此塔即問左右
而此園中素無是塔誰起此塔辟支佛母即
便白言是王太子之中第一小者見王出時
而問我言是何大王巍巍如是我即答言修
陀梨鄩寧轉輪聖王是卿之父復問我言我
當何時應得爲王我語之曰汝於千子第一
最小不應得王其子便言若使不得應作王
者何用在家作白衣爲便辭我出家學道我

便聽之我與共要若得道者必還見我剗除
鬚髮著於袈裟詣山澤中精進坐禪成辟支
佛道如其所誓便還見我我即請之在此園
中日日供養飲食所須經歷數年便般涖涖
在此耶旬起於塔廟是其塔也王聞此語且
悲且喜答夫人言何不語我我即當以轉輪
王位而用與之我不得聞大有折減而今雖
死我以王位而用與之即脫天冠七寶拂飾
王者威服著於塔上王大寶蓋用覆塔上頭
面作禮華香供養伎樂娛樂

佛告阿難乃昔尔時修陀梨鄩寧轉輪王者
今我身是而我尔時自我之子成辟支佛供

養其塔而以王位而用施之大七寶蓋覆於
塔上因是功德無央數劫作轉輪王主四天
下七寶隨從常有三千七寶之蓋自然而至
無央數劫或作天帝或作梵王至于今日若
我不取佛者三千寶蓋常自然至無有窮盡
供養一辟支佛塔受其功德不可窮盡何況
供養如來色身及滅度後舍利起塔作佛形
像供養之者計其功德過踰於彼百千億倍
不可計倍無以爲喻於時大衆皆大歡喜心
悅意解應時有得須陀洹者斯陀含者阿那
含者阿羅漢者或發無上正真道意者或住
立不退轉者不可稱計今時大衆皆大歡喜

遶佛三币頭面作禮各還本所於是世尊進
至毗舍離城到門闌上而說偈言

在地諸天神 虛空住諸天 諸來在此者

皆當發慈心 晝夜懷歡喜 當隨正法言

勿得懷害意 媯惱諸人民

菩薩本行經卷中

器

颯蒲末鎮厭下伊葉反服也降典籍下才反靡

不上苗彼駿子閏反匹匹非下正貢遺下去聲

贈軍持餅也燥焗初巧反與赧穀赧尺小

也麥屑特上則郎反三歲羊也拙余世反

擿他掃挑楷正皆反廐音救養象羯羴

捷下音也 夷相拉 下音底 穉遲 上音鷄 愠心 上音紆

怒也 老莫報反 調我 反上徒吊 草菩 正下古八反

也 璣部 上居依反 龍名也 下時 攘 而羊反 琦 音奇

突 反徒骨 蹈 履音盜踐 兀其 上吾骨反 正 罘塞

上昌力反 瑕 反戶九 脛踝 上胡定反 踣 腸骨也

癢 疲病也 反 一 腔髀 外骨一 同 咲 字 髦 音毛

霍然 上呼郭反 星闕 字下同 閹 門苦本反 媯惚

音 妖鳥反 一弄也 下惱字

本行經卷中

器

